

## Jireenyi Maaliif Uumamtee?-Kutaa 6

### Description

Jireenyi tuni iddo qormaata yommuu taatu, jireenyi Aakhirah immoo iddo jazaati. Jazaan kuni mindaa fi adabbii of keessaa qaba. Namni jirenya qormaata tana keessatti wanta isarraa barbaadamu ulaagalee guutuun hojjate, Guyyaa Murtii mindaa guddaa argata. Namni wanta isarraa barbaadamu hin hojjatin ykn ulaagaalee hojiin fudhatama itti argatu hanqise mindaa guddaa dhaba.

Kutaa darbe irraa itti fufuun har'as wantoota nama qoranii fi wanta nama qoram u irraa barbaadamu ni ilaalla. Wantoota addunyaa qormaata tana keessatti namni ittiin qoram keessaa inni guddaan sheyxaa. Sheyxaa wanta fokkuu nama keessatti miidhagsuu fi wanta gaarii fokkisuun gara jallinnaatti nama waama. Rabbiin subhaanahu wa ta'aalaa ni jedha:

يَبْنَىءَادَمَ لَا يَفْتَنَنَّكُمُ الشَّيْطَانُ كَمَا أَخْرَجَ أَبْوَيْكُمْ مِّنَ الْجَنَّةِ  
 يَنْزَعُ عَنْهُمَا لِبَاسَهُمَا لِيُرِيهِمَا سَوْءَاتِهِمَا إِنَّهُ دِيرَنَكُمْ هُوَ وَقِيلُهُ مِنْ  
 حَيْثُ لَا تَرَوْهُمْ إِنَّا جَعَلْنَا الشَّيْطَانَ أَوْلِيَاءَ لِلَّذِينَ لَا يُؤْمِنُونَ

٢٧

“Yaa ilmaan Aadam! Akka abbaa fi haadha keessan qaama saalaa isaanii isaanitti mul’isuu uffata isaanii isaan irraa mulquun Jannata keessaa isaan baasetti sheyxaa. akka isin hin qorre (hin mokkorre). Dhugumatti inni fi gosti isaa iddo isin isaan hin argine irraa isin argu. Nuti, isaan hin amanneef sheyxaa nota jaalalle goonee jirra.” Suuratu Al-A’araaf 7:27

“Yaa ilmaan Aadam!... sheyxaa akka isin hin qorre” Kana jechuun sheyxaa sossoba isaatiin isin hin gowwoomsin, isin hin jallisin. Qaama saalaa keessan ifatti mul’isu isiniif miidhagsa [1]. Akkuma haadhaa fi abbaa keessan sossoba isaatiin Jannata keessaa baasetti, isinis sossobuun, badii isiniif miidhagsuun, itti isin waamuu fi itti kakaasun baditti isin hin darbin.

“akka isin hin qorre” kana jechuun sheyxaa sossobuu, gowwoomsu, hasaasa (waswasaa) fi hawwisisuu isaatin hanga karaa Gooftaa keessanii irraa isin jallisun warroota ibidda keessatti adabaman keessaa isin godhu gahuutti isaaf haala hin mijeessinaa. Sheyxaa nama sossobuun, namatti hasaasun, badii hawwisiisuu, itti kakaasu fi miidhagsuun baditti nama geessa. Namni sheyxaa nafsee isaa keessatti bakka kennuun wanta inni itti hasaasu, dhugaa se’ee yoo hordofe qilee badiitti isa dabarsa. Wanta fokkuu inni itti miidhagsuu fi hawwisisu akka gaariitti ilaale yoo hordofe jallinnatti isa dabarsa. Kanaafi, Rabbiin subhaanahu wa ta'aala sheyxaa irraa nama akeekachiisa.

Yaa ilmaan Aadam! Sheyxaanni isin sossobuu fi gowwoomsuun akka isin harkisu, sadarka gadi aanaatti akka gadi isin buusu, qilee badii fi cubbuutti akka isin dabarsu nafsee teessan keessatti bakka isaaif hin kenninaa. Akkuma abbaa fi haadha keessan Jannata keessaa baasetti isinis karaa Jannataa irraa isin deebisuun adabbii Gooftaa keessaniitti akka isin hin geessine<sup>[2]</sup>.

**“Dhugumatti inni fi gasti isaa iddooy isin isaan hin argine irraa isin argu.”**

Yaa ilmaan Aadam! Sheyxaanni fi gasti isaa isin waliin ta’uun bakka wayii irraa isin argu. Garuu isin isaan arguu hin dandeessan. Sababni kanaa, Rabbii dandeettiin Isaa guddate, argituu ilma namaa tana daangaa tan qabdu taasise. Fakkeenyaf, iiji namaa qilleensa arguu hin dandeessu. Malaaykota ifa irraa ta’anis arguu hin dandeessu. Akkasumas, qaama jinnis arguu hin dandeessu. Ammas jarmoota, vaayrasoota, baakteriyaa fi kkf maaykiroskoppi malee arguu hin dandeessu. Kuni sirna Rabbiin uumama ilma namaa, malaykoota fi Jinni keessatti kaa’e irraayyi<sup>[3]</sup>. Kanaafu, namni sheyxaana ijaan waan hin agarreef hin jiru yoo jedhe diina isaatiif bakka kennaa jira. Fakkeenyaf, yaa’insa elektrikii (current) ijaan arguu dandeenyaa? Hin dandeenyu. Elektriin maddaan yoo wal qabsiifame fi namni yoo isa tuqe, isa qaba. Asitti yaa’insa elektrikii ijaan hin agarru. Garuu mallatloo isaatirraa beekna. Nama qabuun ykn ifa kenuun yaa’insi elektrikii akka jiru nutti akeeka. Haaluma kanaan sheyxaanni nama keessa naanna’uun baditti nama kakaasun sheyxaanni akka jiru nutti akeeka. Ergamaan Rabbii (SAW) akkana jedhan: **“Akkuma dhiigni naanna’u sheyxaannis qaama ilma Aadam keessa naanna’a”** ([Sahih Al-Bukhaari](#) 7171)

**“Nuti, isaan hin amanneef sheyxaanota jaalalle goonee jirra.”** Rabbiin maq-dhaala guddinna Isaa agarsiisutti fayyadamuun warroota Isatti, Guyyaa Qiyaamaatt, Ergamtoota Isaa fi hundee amanti hafanitti hin amanneef sheyxaanota jaalalle akka godhe beeksisa. Namoonni kunniin osoo amananii silaa sheyxaana irraa of eegu turan. Garuu kafaruun eeggumsa keessaa bahan. Sheyxaanni baditti isaan kakaasa, itti hasaasa. Akka gabrichi gooftaaf ajajamu fi masakamu, isaaniis sheyxaanaf ni ajajamu, ni masakamu. Ergasii dukkanaa fi jallinnatti isaan dabarsa.

Namni sheyxaanan ni qorama. Garuu Rabbiin subhaanahu karaa sheyxaana irraa ittiin of eegan ibse jira. Karaan sheyxaana irraa ittiin of eegan guddan Rabbiitti, Malaykotatti, Kitaabban Isaatti, Ergamtoota Isaatti, Guyyaa Aakhiraatti fi Qadaratti amanuudha. Ergasii yommuu sheyxaanni wanta badaa namatti hasaasu gara Rabbii dheessudha. Qormaata sheyxaanaa jala bahuuf kunniin lamaan wanta namarrea barbaadamaniidha. Iimaanaa fi Rabbiin irraa eeggumsa barbaadu. Mee kanniin Qur'aana irraa haa ilaallu.


إِنَّهُ لَيْسَ لَهُ سُلْطَنٌ عَلَى الْذِينَ كَعَمَنُوا وَعَلَى رَبِّهِمْ

يَتَوَكَّلُونَ 

**“Dhugumatti, inni (sheyxaanni) warroota amananii fi Gooftaa isaanii irratti hirkatan irratti aangoo hin qabu.”** Suuratu An-Nahl 16:99

Kana jechuun sheyxaanni warroota dhugaan amananii fi Rabbiin irratti hirkatan, badii hin araaramamne kan akka kufrii fi shirkii akka hojjatan isaan gochuu hin danda'u. Hiikni bira aayah tanaa: sheyxaanni badii itti isaan waamu irratti ragaa hin qabu<sup>[4]</sup>. (Sheyxaanni badii gurguddaa akka shirkiitti yommuu nama waamu ragaa wayitu hin qabu. Namoonni nama du'e ykn taabota akka gabbaran itti waama. Sammuunis ta'e odeefannoo samii irraa dhufreen ragaan wantoota kanniin gabbaruun sirrii akka ta'e agarsiisu gonkumaa hin jiru. Akkasumas, yommuu Rabbii fi Guyyaa Qiyaamatti akka hin amanne nama waamu, ragaa wayitu hin qabu. Namoonni amanan sheyxaanaaf hin awwaatan.)

Yommuu sheyxaanni wanta badaa akka raawwatan namatti hasasu, Rabbii olt'a'aa irraa eeggumsa barbaadudha. Rabbiin subhaanahu wa ta'aalaa ni jedha:



**“Yoo garagalchaan (hasasni badaan) sheyxaana irraa sitti dhufe, Rabbitti maganfadhu. Dhugumatti Inni Dhagaha, Argaadha.”** Suuratu Al-A'raaf 7:200

Kana jechuun yommuu sheyxaanni wanta badaa sitti wasawasuu (hasasu), hojii gaarii irraa duubatti si harkisu ykn hojii badaatti si kakaasu, gara Rabbii dheessuun akka si eegu kadhadhu. Inni wanta jettu dhagahaadha. Niyyaa fi dadhabinna kee, hangam gara Isaatti akka dheessutu ni beeka. Yoo dhugaan gara Rabbii dheessun sheyxaana irraa akka si eegu kadhatte, Inni qormataa fi waswasaa isaatirraa si eega<sup>[5]</sup>.

Sheyxaana irraa tiikfamuuf akkaata Rabbiin irraa eeggumsa itti barbaadan Qur'aanaa fi hadiisa keessatti dhufe jira. Qur'aana keessatti suuratu An-naas (114) qara'u. Yookiin (*Rabbi a'uuzu bika min hamazaati shayaaxiin wa a'uuzu bika rabbi a'yahduruun*) “ jechuu. Hiikni kanaa:  
**Gooftaa kiyya, ani hasasa sheyxaanotaa irraa Sittiin maganfadha. Gooftaa kiyyaa isaan natti dhufuu irraa sitti maganfadha.** ” (ilaali Suuratu Mu'imnuun:97-98)

Sitti maganfadha=Siin tiikfama

Yookiin a'uuzu billaahi mina sheyxaani rajim (sheyxaana abaarrame irraa Rabbiin tiikfama) jechuu.

Namoonni hin amanne fi eeggumsa Rabbiin irraa hin barbaanne, qormataa sheyxaana keessatti kufu. Ergasii jallinna, dukkanaa fi adabbi guddaa keessatti taru. Kanaafi, sababni guddaan namni itti jallatuuf sheyxaana hordofuudha. Rabbiin subhaanahu wa ta'aalaa ni jedha:

فِرِيقًا هَدَىٰ وَفِرِيقًا حَقَّ عَلَيْهِمُ الضَّلَالَةُ إِنَّهُمْ أَنْخَذُوا أَلْشَيْطِينَ  
أَوْلِيَاءَ مِنْ دُونِ اللَّهِ وَيَحْسَبُونَ أَنَّهُمْ مُهْتَدُونَ

٣٠

“[Rabbiin] garee tokko ni qajeelche, gareen bira immoo jallinni isaan irratti mirkanaa’ e. Dhugumatti, isaan Rabbii gaditti sheyxaanota jaalallee taasifatan. Isaan akka qajeelfamanitti yaadu.” Suuratu Al-A’araaf 7:30

“[Rabbiin] garee tokko ni qajeelche” kana jechuun yommuu isaan jirenyaa addunyaa keessatti karaa qajeelinnaa filatan, Gooftaa fi Tokkichummaan gabbaramu kan qabu Rabbiin qofa akka ta’ e yommuu amanantii fi Islaama isaanii labsan, Rabbiin qajeelinna isaaniif murteesse [6]. Qajeelinna akka argatan isaan taasise, sababoota qajeelinnatti nama geessu ni laaffiseef. Wantoota qajeelinna irraa nama dhoowwan isaan irraa deebise [7].

“gareen bira immoo jallinni isaan irratti mirkanaa’ e.” kana jechuun jirenyaa addunyaa keessatti karaa jallinnaa ofiif waan filatanii fi iimaanaa fi Islaama Rabbiin isaan irraa barbaadu waan hin guunneef jallinni isaan irratti mirkanaa’ e. Sababni kana hundatti isaan geesse sheyxaana jaalalle ykn hiriyyaa dhiyoo godhachuudha. “Dhugumatti, isaan Rabbii gaditti sheyxaanota jaalallee taasifatan.” Yommuu isaan Isaaf ajajamuun Rabbitti dhiyaachu dhiisan, sheyxaanaaf ajajamuu fi hordofuu jaalallee fi hiriyyaa dhiyoo isa godhatan. Sheyxaanni fedhii lubbuu hordofuu, faaya addunyaa tanaa fi wantoota dhoowwaman isaaniif bareechise. Yaada fi hojii fokkuun isaan gowwoomse. Hanga qilee jallinnaatti taranii adeemsa isaanii keessatti faana sheyxaanaa duuka bu’ an. Jallinna isaanii kana walinu “Nuti warra qajeelfaman” jechuun yaadu. Sababni isaas, dhugaan dhimmoottaa fuggisoo isaanitti ta’ e. Baaxila (soba) dhugaa akka ta’ etti yaadan. Dhugaa immoo soba akka ta’ etti yaadan [8].

Sheyxaana jaalalle fi hiriyyaa godhachuun jallinna guddaa akka jallatan nama taasisa. Rabbiin subhaanahu wa ta’ala ni jedha:

كُتُبَ عَلَيْهِ أَنَّهُ مَنْ تَوَلَّهُ فَإِنَّهُ يُضِلُّهُ وَيَهْدِيهِ إِلَىٰ عَذَابٍ

السَّعِيرِ

“Isa (sheyxaana) irratti ‘Inni nama jaalalle isa godhate kamillee ni jallisa, gara ibidda boba’ aatti isa qajeelcha’ jechuun barreefame jira.” Suuratu Al-Hajj 22:4

Kana jechuun namni sheyxaana hordofe, sheyxaanni haqa irraa akka isa jallisuu fi Aakhiratti gara ibidda bobaa’ atti akka isa geessu murteefame jira.

Wanti asirraa hubannu, qajeelinni fadlii (tola) Rabbiin irraa ta'eedha. Jallinni immoo sababa namni sheyxaana hordofeefi. Namni fedhii ofiitiin sheyxaana yoo hordofe ni jallata. Jallinna kana irraa tawbachuun gara Rabbii yoo hin deebi'in, Rabbinis jallinna isaa keessatti isa dhiisa. Haala kanaan jecha, "Rabbiin nama fedhe ni qajeelcha, nama fedhe ni jallisa" kan jedhu ni hubanna. **"Jedhi 'Dhugumatti, Rabbiin nama fedhe ni jallisa, nama [tawbaan gara Isaatti] deebi'e immoo gara Isaatti qajeelcha."** (Suuratu ar-Ra'ad 13:27) Sababa isaan waan badaa hojjataniif, gara Isaatti deebi'u didanii fi sheyxaana hordofaniif Rabbiin isaan jallise.

### Guduunfaa

?Sheyxaanni namootaaf qormaata cimaadha. Karaan qormaata isaa kana jalaa ittiin bahan, dhugaan amanuu, Rabbiin irratti hirkachuu, hojii Isaaf qulqulleessu (iklaasa qabaachu) fi eeggumsa Rabbiin irraa barbaadudha.

?Namni wantoota isarraa barbaadamu kanniin hin hojjanne, sheyxaanni isa jallisa.

?Sheyxaanni nama jallisuu jechuun dhugaa soba fakkeessu, soba immoo dhugaa fakkeessuun haqa irraa akka fagaatanii fi soba hordofan taasisudha. Akkasumas, wantoota fokkuu fi dhoowwamanitti akka lixan nama taasisudha. Ergasii dhumarraati adabbii (azaaba) guddaatti geessa.

? Sheyxaana hordofuu jechuun wanta badaa inni namatti hasaasu hojii irra oolchuf tattaafachu, dhugaa jibbuun soba hordofuu fi hawwii sobaa duuka bu'uudha.

? Namni sheyxaanan gowwoomuu yoo baditti kufe, wanti isarraa eeggamu tawbaa fi istighfaara. Kana jechuun badii irraa buqqa'uun gara Rabbii deebi'uun fi araarama Isa kadhachuudha. Fakkeenyaaf nabii Aadam (aleyh salaam) yommuu sheyxaanni isa dogongorsu, yoosu tawbachuun Rabbiin araarama kadhate. Rabbiinis tawbaa isaa irraa qeebalun dogongora isaa ni araarameef.

### Kitaabban wabii:

- [1] Zaadul Masiir-fuula 490
- [2] [Ma'aarij Tafakkuri wa daqaa'iqu tadabbur](#)– Abdurahmaan Hasan Habankaa 4/159-160
- [3] Madda olii
- [4] Tafsiira Qurxubii-12/426
- [5] Tafsiir sa'diyyi-356
- [6] [Ma'aarij Tafakkuri wa daqaa'iqu tadabbur](#)– Abdurahmaan Hasan Habankaa 4/177
- [7] Tafsiir Sa'diy- 322
- [8] Maddoota olii

### Date Created

May 21, 2019

### Author

admin